

Za budućnost bh. folkloru u Birminghamu ne treba brinuti

Uspješan rad članova „Mladost Bosne“

Od oktobra smo startali s novom sezonom, kaže dugogodišnja koreografkinja Fahira Hasedžić • Pozivi iz Austrije i Švedske • U budućnosti i sevdalinke

Vjerovatno najmlađa folklorna sekcija u cjelokupnoj bh. dijaspori je „Mladost Bosne“ iz Birminghama, čiji najstariji član Aida Burazerović ima 10 godina, a najmlađa je petogodišnja Nejra Gazibegović.

Naravno, njihove godine nisu prepreka da ova folklorna sekcija uspješno radi, a osim vrijednog rukovodstva, koje sačinjavaju Lejla Gazibegović, Suada Bogdanić i Dženan Burazerović, dugogodišnju koreografkinju Fahiru Hasedžić upitali smo kako napreduju novi mladi članovi folklorne sekcije.

Smjena generacija

- Za budućnost folkloru u Birminghamu ne treba se brinuti. Generacije se smjenjuju, jedni odlaze iz folkloru, a dolaze mladi, koji jedva čekaju da zaigraju. Od oktobra smo startali s novom sezonom. Tokom prošle godine izvršena je potpuna smjena



Folklor „Mladost Bosne“: Puni entuzijazma

generacija, a ovaj novi, mladi folklor pun je entuzijazma i želje za dokazivanjem.

Kompletan sastav

Ovaj zapis o „Mladosti Bosne“ bio bi siromašan a da ne nabrojimo kompletan sastav: Amar Burazerović, Haris Gazibegović, Aida Burazerović, Selma Bektić, Selma Bogdanić, Naida i Aida Dautović,

Samra Hošić, Ayla-Belma Hadžović, Lejla Karić, Amina Mekić, Azemina i Medina Musić, Nejra Gazibegović i Turkinja Merva Fidan, kojoj nisu strani taktovi naše muzike.



Burazerović, Bogdanić, Gazibegović i Hasedžić: Vrijedno rukovodstvo



Selma Bogdanić i Lejla Karić: Izvanredni solisti

Nažalost, kao i u starom sastavu, i ovdje je problem sa muškim igračima, koji se nekako stide da pokažu šta znaju. Ipak, dvojac Amar Burazerović i Haris Gazibegović ulijeva nadu da će se i ostali dječaci ovog uzrasta pridružiti folkloru.

Do sada je novi folklor imao dva značajna nastupa, na južnom skupu bh. dopunskih škola u Gulfordu i na centralnom obilježavanju Dana državnosti BiH u Birminghamu.

- Mimo očekivanja, djeca su svojim nastupom oduševila sve prisutne. Ovaj mladi folklorni sastav u svojim redovima, osim dobrih igrača, ima i nekoliko izvanrednih solista, koje predvode sedmogodišnje Lejla Karić i Selma Bogdanić te njihovi vršnjaci Amar Burazerović i Haris Gazibegović. Na osnovu ovog novog, dodatnog kvaliteta, u budućnosti ćemo u program uvrstiti i izvođenje naših sevdalinki - kaže Hasedžić.


Naravno, uz novi folklor ide i novo rukovodstvo. Predsjednica folklorne sekcije Lejla Gazibegović kaže:

Gostovanje mađioničara

- Staro je rukovodstvo odlično radilo i na računu nam je ostavilo i dovoljno novca da možemo nesmetano raditi u narednoj godini. Planiramo nastupiti u Londonu tokom obilježavanja Dana nezavisnosti naše zemlje, a naš mladi folklor ima pozive iz Austrije i Švedske za gostovanje u tim državama.

Kao nagradu za vrijedne treninge, članove naše folklorne sekcije, a i svu ostalu djecu iz Birminghama, tokom ovogodišnjih praznika počastit ćemo gostovanjem našeg mađioničara Jasmina Mešića iz Edinburga.

N. ALIMAŠTOROVIĆ



Huseinović u Tuzli: U posjeti rodbini

(Foto: A. Bajrić Bličko)

Said Huseinović, nogometaš Verdera

Na zimskom odmoru u Tuzli

Za šest mjeseci boravka u Njemačkoj Huseinović se dobro adaptirao na novu sredinu

Bundesligašku zimsku pauzu nogometaš bremenskog Verdera Said Huseinović iskoristio je da dođe u Tuzlu u 15-dnevnu posjetu rodbini. Nakon zimskog odmora, 5. januara će otputovati u Antaliju na Verderove pripreme za nastavak proljetnog dijela takmičenja.

Huseinović se nedavno, prvi put od kada je prije šest mjeseci iz tuzlanske Slobode prešao u Bremen, našao u startnoj postavi Verdera te, kako tvrdi, ispunio i svoja i očekivanja trenera Tomasa Šafa (Thomas Schaaf). U toj je utakmici Verder savladao Wolfsburg, tim našeg Edina Džeka.

- Kada sam prešao u Verder, bio sam najsretniji čovjek na svijetu, baš kao i moj menadžer Adem Šabović. I kada sam startao u prvoj postavi i kada smo u toj utakmici savladali jaku ekipu Wolfsburga, osjećaj sreće je bio sličan. Kompletan mi je tim pružio ogromnu podršku, a po izlasku s terena, na dobroj mi je igri čestitao i trener Šaf, kao i Edin Džeko, sa kojim sam nakratko razgovarao nakon meča - govori Huseinović.

Za šest mjeseci boravka u Njemačkoj Said se, kako kaže, dobro adaptirao na novu sredi-

Ide na časove njemačkog

Slobodno vrijeme u Njemačkoj Said koristi i za učenje jezika, što mu, kaže, dobro ide.

- Tri puta sedmično idem na časove njemačkog jezika i za sada mi ide dobro.

Društvo mu često prave saigrači Duško Tošić i Jurica Vranješ, a ističe da mu je dobar prijatelj i Portugalac Matijas Almeida. Još odranije je u dobrim prijateljskim odnosima sa našim golgeterima Sejadom Salihovićem i Vedadom Ibiševićem, koji mu pružaju veliku podršku.

- Najveći šaljivdžija u ovoj momčadi je Dijego (Diego), sa kojim se često družim na treninzima. To je pravi nogometni čarobnjak, kojeg sam donedavno gledao samo na televiziji. Moj se san ostvario - govori Huseinović.

Sa bivšim saigračima iz tuzlanske Slobode stalno je u kontaktu. Klubu s Tušnja i njegovim igračima u nekoliko je navrata pomogao doniranjem sportske opreme.

A. Mu.

“Mali šlager 2008”

Šiber rastužio djecu



“Mali šlager 2008” otkazan je u posljednji čas iako su djeca već snimila pjesme. Snimljene su i TV najave, ali Boris Šiber, urednik programa za djecu i mlade na Federalnoj TV, koji je bio jedan od organizatora “Malog šlagera 2008”, jednostavno je kazao da su se “malo preračuna-

li”, jer su im otkazali i sponzori. Ni oni niti Federalna TV nemaju novac, a skoro 40 djece od četiri do 11 godina koja su se prijavila na Festival u međuvremenu tuguje, neki i plaču, neki su razočarani... Jer, kako će im roditelji objasniti da nečega ima pa nema.